

**Mahkamah Tolak Petisyen Pilihan Raya Lembah Pantai
Bernama
1 Ogos, 2013**

KUALA LUMPUR, 1 Ogos (Bernama) -- Mahkamah Pilihan Raya hari ini menolak petisyen pilihan raya difailkan seorang pengundi yang mempertikaikan keputusan pilihan raya umum ke-13 bagi kerusi Parlimen Lembah Pantai yang dikekalkan oleh Nurul Izzah Anwar daripada PKR.

Hakim Datin Zabariah Mohd Yusof memutuskan bahawa petisyen yang difailkan pengundi, Mohamad Sazali Kamilan, adalah remeh, menyusahkan dan penyalahgunaan proses mahkamah.

Ketika membenarkan bantahan awal Nurul Izzah berhubung petisyen itu, hakim berkata pempetisyen (Mohamad Sazali) gagal mengemukakan fakta penting untuk menunjukkan tindakan boleh diambil terhadap responden pertama (Nurul Izzah).

"Petisyen pilihan raya seperti ini sangat bergantung kepada undang-undang pilihan raya. Pempetisyen gagal mengemukakan fakta mencukupi untuk menyokong dakwaan pelanggaran peruntukan dalam Peraturan-peraturan Pilihan Raya (Perjalanan Pilihan Raya) 1981, Akta Kesalahan Pilihan Raya berkaitan amalan rasuah yang didakwa itu," katanya.

Zabariah memerintahkan Mohamad Sazali membayar kos RM40,000 kepada Nurul Izzah.

Hakim juga berkata petisyen pilihan raya itu tidak difailkan oleh pempetisyen atau peguam mengikut Kaedah 9 dan 34 Kaedah-kaedah Petisyen Pilihan Raya 1954.

"Bidang kuasa mahkamah tidak digunakan, oleh itu petisyen pilihan raya ini boleh ditolak berdasarkan alasan ini semata-mata," katanya.

Dalam petisyen itu Mohamad Sazali menamakan Nurul Izzah, Pegawai Pengurus Pilihan Raya Rolan Abd Rahman dan Suruhanjaya Pilihan Raya sebagai responden.

Pada pilihan raya umum lepas, Nurul Izzah mengekalkan kerusi berkenaan dengan majoriti 1,847 undi.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=967645>